

**Der Schwa?bische Vhu. : Beschrieben, sampt seiner Newen
fu?rgenommen vogelstelle in der Lo?blichen Eidgnosschafft,
im Monat Septemb. Anno 1588**

<https://hdl.handle.net/1874/456923>

g

2

Der Schwäbische Büch.

Beschrieben / sampt seiner Newen
fürgenommenen vogelstelle in der Lößlichen
Eidgnoschaft / im Monat
Septemb. Anno
1588.

Durch Johann Sauren / Pfarrer zu Frammsberg.



Ouidius Lib. Metam. 8.

Ignauus bubo, dirum mortalibus omen.

Getruckt zu Eulenburg durch
Heyne Vogler.

Philippus Melanthon, in Colloquio Vuormatiensi:
Anno 1557.

Behüt Gott: Das dieser Schwab keinen rugken be-
komme: Sonst wirdt er in Teutschlanden/
grossen jamer anrich-
ten.

EVOVAE: Sang diser Vhu darzu.

Ierem. Cap. 23.

Die Propheten betriegen euch. Dann sie predigen ihrs her-
zen gedicht: Vnd nicht auß des Herren Mund: Sie sagen des
nen/ die mich lesteren: Der Herr hats gesagt.

Ich sandte sie nicht: noch lieffen sie: Ich redet nicht zu ihnen:
noch weissagten sie / 26.

Schwäbischer Vhu.

Bywigg/ gywigg/ Tschuhu tschuhu/
Schrey vberlaut/ ein groß Vhu.
Ein vngehewrer Vogel zmal/
Alln vöglen vngwohn vberal.
In disem Herbstmond flog daher:
Sucht nit meüß/ sondern fleisch vnd schmeer.
Wie er zuvor hat des gewohnt:
Vnd keinem land schier nit verschont.

Ir lieben gsellen/ hand gut acht:
Diser vogel fleugt nur bey der nacht.
Ein kind der Finsternuß ist gar:
Das liecht verdunklet hat viel jar:
Mit seinem schwarm/ Vbiquitet:
Die ihn durch all land treiben thet:
Das er damit/ als mit eim kloben/
Fieng vögel vnten vnd auch oben:
In allen bergen/ vnd alln gründen/
Wo er in welden die konnt finden.
Viel Edler Vogler hand mit gelt/
Den Vhu zu ihm kloben bßelt.
Der frist nit Lebern oder Herß:
Die feistten meüß/ sind ihm ein scherß.
Gut Silber/ Gold/ vnd Edle gaben/
Wil diser schwesig Vhu haben.
Trinckt auch kein Wasser/ sonder Wein:
Bey nacht nit kan leichtsinnig sein:
Ein starcker schlafferunck/ werd ihm dann
Da wigglet er/ ohn alle schamm.

4 Schwäbischer Vhu.

Vnd macht/ Huhu/ ihr lieben knaben:
Ein solchen trunck/ den muß ich haben:
So kan ich mich frisch mausig stellen:
Viel vögel locken zu der Hellen.
Die durch mein gsang/ vnd vnghewr gstat/
Meim kloben fallen zu mit gwalt.

Diß gsang schafft/ das er bißher offte/
Beschickt ist worden/ wie er ghofft:
Von grossen Herren/ Edel tewr:
Weil er sich berdet vnghewr:
Vnd hett ein gsang/ auß wunder/ werd:
Als sonst kein vogel auff der erd:
Der zu Hoff lieb ist/ vnd angnem:
Ob er gleich auß Catekutt herkem.

Viel land vnd wald/ hat er durchschlichen:
Sein kloben außgestreckt manniglichen:
Im Thüringer/ Hartz/ vnd Behmer wald/
Von dannen flog er mit gewalt:
In Saren/ muhtig vnd gar feck/
Schaudert auch 3 Wittenberg im speck.
In der Marck/ Braunschweig/ Lüneburg/
In Seestetten/ auch Magdeburg.
Endtlich kam er in Berg darbey/
Sein kloben streckt er auß da frey.
Fieng da nit nur klein vögelein:
Groß Herren vögel/ nam er ein.
Die setz er bald zu seinem kloben/
Damit han sie zusammen zogen:
Viel vögel in gar manchen landen/
Zu ihrem schaden/ vnd groß schandens

Schwäbischer Vhu.

S

Hie zeitlich/vnd dort ewigklich:

Das sag ich/leider/sichertlich.

Ein grosse meng bracht er zusammen:

Mit hundert/vnd viel tausent nammen:

In Höfen/Stetten/Kirchen/Schulen:

Umb die er meisterlich kundt bülen.

Die sieng er mit dem gsang/ Gynwigl:

Bracht sie damit in seinen strick:

Weil ihn der gsang gar wunder war/

Andre ergriff er bey dem haar:

Schreckt sie/mit vngewrem/Huhu:

Vnd trieb sie auff sein Kloben zu:

Zum schönen Sack/Concordi Buch/

Damit er anders gar nichts gsucht:

Dann rach gir/gelt/vnd weltlich Ehr:

Darinn versteckt er falsche leer.

Vertrib mit seinem Vhu gsang/

Von Kirchen vnd ihm Vatterland:

Die besten Lerchen/Nachtigallen/

Weil sie ihm gar nit zugefallen/

Sein Kloben wolten loben/zieren:

Vnd damit lassen sich verführen:

Vnd sich tückisch auffklemmen lahn:

Welchs dem Vhu anfieng weh than:

Insonders/da sich viel han bsunnen/

Vnd sind seim Kloben gar entrunnen:

Vnd ihn han glernet recht erkennen/

Vnd theten sich von ihm abtrennen.

Das thet ihm also grimmig weh:

Das er nit wissen kondt nuh meh:

Wo er diß zeit solt Vögel fahen/
In welchem Wald/sein Läger schlafen.

In Saren dorffte er nit mehr keeren/
Da niemand ihn wil mehr verehren.

Er dacht/ich hab wol Vögel gfangen/
Da ich ins Allgöw bin gegangen:

Zu Memmingen streckt auß mein Kloben.
Da thet man mich preisen vnd loben.

Ob mir gleich da gstele ward mit kläb:
Ist mein brauch/das ich nichts drauff geb.

Kleberus.

Ich bin ihm 3 starck/Gywig/Huhu/
Das schrey ich laut vnd starck hinzu:

Vnd reiß mich gwaltig so darvon:
Zu Lindaw ward ich auch gar schon/

Empfangen/vnd gar herlich gniest:
Mit Fischen auß dem See auffß best.

Gehn Regensburg fernd war mir gaach:
Damit auch ich daselbst mein raach/

Erzeigt/vnd griet mir eben wol:
Ob man von mir schon sagen soll:

Ein Bucherypfaß/sey ich da worden:
Sey treten auß der Eulen Orden.

Wiewol dieselben/glaub mir eben:
Nur vom Raub/vnd dem Bucher leben:

Vnd treibend gute Vögel ab:
Wie ich da fünff vertriben hab:

Zu Regensburg/mit Fürsten gsterckt:
Die ich brauch/zu mein Bogler werck.

Gleich wie der Papst all Potentaten/
Die ihm helffen/vnd trewlich rhaten/

Zu stercken seinen Stul vnd pracht:
Also ich sekund eben tracht:

Das

Das ich getragen/von zween Herren/
 Darwider sich niemand sol sperren:
 Wil disen Herbst mich lassen ein/
 In ein starck Land/wol vber Rhein.
 Solche starcke Vögel in dem Gbirg/
 Zu fahen/nit das ich sie würg:
 Sonder/das sie mit starcker hand/
 Mir thuen starcken widerstand:
 Alln denen/so mir gefallen ab:
 Das ist/das ich jetzt vor mir hab.

Als diser Vhu solchs außdenckt:
 So bald sich an zwen Herzen henckt.
 Sie sollend seine Vogler sein:
 Mit ihren Hütten vber Rhein.
 Bricht vrsach bald vom zaun herab:
 Wie er wol kan/der nasse Knab.
 Vnd das man sein gar höflich schon:
 Kompt er in einr Legation.
 Von Herzen dienern wird er tragen:
 Vnd kompt in einem Herren Wagen.
 Gar prechtig fehrt er zu den Landen:
 Vnd schwingt sich in den Wald heist Randen.

Ein schöner Wider in dem Wald/
 Ward diß Vhus gewar so bald. Wider.
 Kennet disen Eulen vogel wol:
 Sprach/diser mir recht kommen soll.
 Ich weiß/er trinckt gern guten Wein:
 Den find er hie an vnserm Rhein/
 Hüpsch rot vnd schön/nach sein beger/
 Der Wiert treget ihn mit freuden her:

Hilffte ihm die Becher lähren auß:

Bis mittnacht halt mit ihm die Paus.

Der Vhu streckt den Schnabel krumm/

Sprach: hie bleib ich/zu bett nit kumm:

Bis ich deß saffes hab gnug geschleckt:

Deß morgens ihn die Sonn auffweckt.

Fuhr da hinweg/weiter ins land.

Bis das er einen Lustwald fand:

Darinn viel starcker Bären lagen:

Bär.

Da/sprach er/wil ichs Läger schlagen.

Hub an/schrey laut/Bywigk/Tschuhu:

Die jungen Bären lieffend zu.

Sampt vielen Vöglen also bald:

Vnd fielen heuffig in den Wald.

(Die Eulen hand sie vor nit kennt:

Sonst weren sie nit dahin grennt.)

Sie lieffen ihn wigklen vnd schaudren:

Doch etlich siengen an zu maudren:

Sampt allen Vöglen in dem Wald:

Sie fragten andre auch so bald:

Ob disem Vogel wer zu ghorchen/

Oder zu stiehen wie die Storchen/

Den armen Fröschen in dem bach:

Es war ein wunderliche sach.

Der Vhu bredt die Bären frumm/

Daß sie vmb ein Colloquium/

Beim Hirten mit seim Hirten stecken/

Oder beim Wider in seim Flecken/

Ein muthung theten: auch den Löwen/

Solch werbung solt gar wol erfreuen.

Da sach ein jeder frommer zu:

Wie vnverschampt wer der Vhu:

Der

Der wolt vns wigglen/ frieden schaffen/
 Gleich wie der Wolff den armen Schafen/
 Die er mit Predign zu sich breitet:
 Bist er sie all verschlungen hett.

Denn Bären/ vnd ihren Vöglen zwar:
 Auch diser Nachteul gleich zumal:
 Ein solche antwort ward gegeben:
 Der diser Vhu nit wolt gleben.
 Vnd ob er gleich auch kommen solt/
 Zum edlen Löwen als er gwolt:
 Auch zu dem Hirten mit dem Stab:
 Zum Wider auch nach wunsch vorab:
 Hat doch diß Eul den Braten geschmeckt:
 Vnd was ihm an den Spiß gesteckt:
 Das ihm nit wer zu Ehren kommen:
 Darumb hatt sie ihren flug genommen/
 Durchs Hirten Statt/ zornig vnd bhend/
 Daz sie vielleicht nit kem in dhend:
 Der Fischer/ Becker/ Steinbrüch Buben/
 Die im Land pflegen fleissig lügen/
 Auff solch vnghevre Vögel dar:
 Darüber sie mit ihrer schar/
 Zu zeiten fallen ohngefehr/
 Das solche gwölt/ sie nie daher/
 So vnverschampt sich dörrffen lassen/
 An dise end/ vnd solche strassen/
 Die diser Vhu frech vnd wilde/
 Für Türckisch/ Mahometisch schilt:
 Fürs Teuffels kinder auß thut schreyen/
 Vnsinnig lestrung auß thut speyen:

Io Schwäbischer Vhu.

Die er so trotzig außher geuht/
Die Warheit mit seiner Lügen scheuht.
Vschönt sich darbey mit weltlichem Arm:
In seinem Keiserischen schwarm.
Vnd wenn gleich Gott/vnd gwalt auff Erden/
Von ihm muß hoch gelestert werden:
So sind seine Herzen doch so zart/
Das ihnen niemandt darff im Bart/
Rein härlin darumb krümmen nicht/
Wenn sie der Vhu schon vom Liecht/
Gar jämmerlich hat abgeführt/
Da wirt kein vngnad nit gespürt:
Der Vhu ist der semper frey:
Was er gleich schende oder schrey.
Er ist allweg der liebe Sohn/
Was er thut/das ist wol gethon.

Doch/weil derselb zu diser frist/
Zum end seins voglens kommen ist.
Vnd sein Gynwig vnnnd Huhu gfang:
Nicht mehr will han sein gwünschten klang.
So sing er nuh die zeit fortan:
Es saß ein mal ein Eul vnd span:
In einem finstern Kämmerlein/
Sie sach mich vbel an.
Schrey auch mit macht/Gynwig/Tschuhur:
Biß alle Thoren lauffen zu:
Vnd tanken vmb/vnd vor ihm hin/
Vnd schencken ihm darzu den Wein.

Das ist bey mennigklich bekannt/
Als diser Vhu kam ins land.

Schwäbischer Vhu.

II

So bald sind kommen mit/in eyl/
Viel tausent Vögel/also vil:
Das sie am Wein groß schaden than/
Daran erkennt ja jedermann/
Wo dise Eul kompt an ein end/
Das sich dahin all vnglück wende.
Wie solchs bezeugen alle land:
Darinn man disen Vhu fand.
Drumb wer will sein alls vnglücks frey:
Ker sich nit an sein Eulen gschrey.
Vhalt reinen Glauben/ gsunde Lehr:
Mit betten sich zum Herren Lehr.
Vnd flich den Vhu wie die Hell:
So wird er bhüt vor vngesell.

Amen/30. Septembr. 1588.



Ein new Lied / zu gebührendem Lobe/
dem scheütlichen Vhu: damit er an seinm
Gsang/erkennt werde. In der Melodey: Von
vppiglichen dingen/da will ichs
heben an/ıc.



I.

Groß not dringt mich zusingen:
Ein Lied zu diser frist.
Von wunderlichen dingen:
Wie jeder Meister ist.
Eh dann er hat studiret:
Der Kinder A/B/C.
Vil leuth der stoltz verführet:
Mancher den Himmel rühret:
Weist nit/ warauff er sich.

II.

Wiltu gleert sein auff Erden:
So folge meiner lehr.
Bald kanstu Doctor werden:
Schend frommer Männer Ehr.
Beim haar thue sie sein rauffen:
Auff Canslen vnd beim Wein.
Mit lügen thues anlauffen:
Du darffst sie doch nit kauffen:
Damit sie Reker seyn.



Wiltu

III.

Wiltu die lügen ficken:
 Weil sie nicht kan bestahn:
 Auff sündlein thue dich schicken:
 Das du doch recht mögst han.
 Erdicht new wort vnd namen:
 Wer wolt dir reden drein.
 Die Narren sprechen Amen:
 Vnd lauffen bald zusamen:
 Vnd schencken dir den Wein.

IIII.

Was du hast also funden:
 In deiner fretterey.
 Dasselb rueff auß von stunden:
 Das es klar Gottswort sey.
 Was andre recht thun leeren:
 Sey dir nur fehery.
 Solst dich zum Bapst schon leeren:
 So laß dir doch nicht wehren:
 Auff dein kopff bleib nur frey.

V.

Sprich ist/In, darnach SVETER:
 Bald drauff die wahr SVBSTANTZ:
 VBIQVE, vnd auch SVPER NATVRAM,
 Hatt gut glantz.
 REAL kompt dir zum besten:
 Darffst auch keins ACCIDENTS:
 Vnd solt dem Kexer bresten:
 Kanstu dich daruon mesten:
 Dir gschicht groß REVERENTS.

VI.

Ist dir ohn not zu leeren:

Des Herren Himmelfart.

Daran thue dich nit leeren:

COELVM VBIQVE ward.

Das Christus mensch mög bleiben:

Darff er nit haben hend.

Kein füeß vnd keine seiten:

So thust die recht ban schreiten:

An deinem letzten end.

VII.

Laß alle Christen singen:

Von Krippen vnd Creutzholz.

Laß Osterliedlein klingen:

Viel mehr geldt doch dein stolz.

Denn was der Glaub thut weisen:

Mit grund der Heiligen schrift:

Sprechstu der Herz wer eisen:

Man ließ sich auch bald weisen:

Weil du solchs heist erdicht.

VIII.

Sprich/ Christus sey im Himmel:

Mit seinem leib/ doch schnell

Volg deinem schwindel trümmel:

Sprich/ sey auch in der Hell.

Darzu an allen enden:

In wasser/ stein vnd holz.

Wer dich daruon wil wenden:

Den thue bald schiessen schenden:

Mit deinem siederholz.

Obschon

Obschon hierwider schreibet:
 Die ganz alt Christenheit:
 Vnd kein Papist solchs treibet:
 Inuor/ vnd diser zeit.
 Sols doch dir gwaltig gelten:
 Mein lieber Domine.
 Nur grausam thue drein schelten:
 Mit Quirin vnd sant Velten:
 So hats kein not nit mehr.

X.

Hiemit wil ich beschliessen:
 Sonst kem ich nit zum end.
 Obs jemand wolt verdriessen:
 So wesch ich meine hend.
 Die schuld ist mein nit gewesen:
 Ich geb im guten rhat:
 Das Göttlich wort thue lesen:
 So wird er wider gnesen:
 Darumb er zürnet hat.

XI.

All menschen wölst probiren:
 Sey lauter oder trüeb:
 Laß dich auch nit verführen:
 Dein Ehr/ vnd eigne lieb.
 Wer claar Gotts wort thut bringen:
 Dhn eigne phantasen:
 Auff reinen glauben tringen:
 Mit alter Kirch zustimmen:
 Ein werder gast dir sey.

Sein leib vnd blut thut schencken:

Im Heiligen Abendmal:

Im glauben sein zu dencken:

Christus der Herz fürwahr.

Wer mehr wil fantasiren:

Viel narren mit ihm macht:

Arm leut thut er versüchren:

Des Herren leib verlieren:

Sein ewigs heil veracht.

Der Lateinischen wörter dolmetschung.

IN. In dem brodt.

SVETER. vnter dem brodt.

Die SVBSTANTS. das brodt sey der warhafftig wesent-
lich leib Christi.

VBIQVE. Der leib sey allenthalbig.

SVPERNATVRAM. Der leib sey vbernattürlich im brodt.

REAL. Der leib sey natürlich im brodt: Ja / das brodt/
sey warhafftig / mit der that / eigentlich / der natürlich leib.

ACCIDENTS. Der leib hab nichts zufelligs / oder eussere-
lichs: Das ist: er sey vn sichtbar / vn begreiflich / vn empfindlich /
vn umbschriben / vn endsam / in allen seinen gliedern vnd stücken.

COELVM VBIQVE. Der Himmel sey allenthalben / an
allen enden vnnnd orthen. Dawider besihe: Luc. 24. Joh. 20.
Phil. 3. Coloss. 3. Act. 1. 3. 1. Cor. 15. / 1c.